

Parlamentario Robert Candelaria (AVP):

‘Ta papia di cultiva, pero kier legalisa uzo recreacional di marihuana’



ORANJESTAD - E go-
bierno aki a hunga cu e
topico di legalisacion di
marihuana pa basta tem-
po y esey ta un ehempel
di un maneho cu no ta
coherente. Parlamentario
di fraccion AVP, Robert
Candelaria, a yega di trece
dilanti caba, cu nos prome
minister a bisa den Parla-
mento cu lo considera cul-
tivo di marihuana como
un posibel pilar econom-
ico nobo na nos pais na
luga di e refinaria. Esaki
ta algo completamente
ilogico.

Bo no por haci esaki y bisa
hobennan di bo pais despues
cu a planta e isla completa-
mente cu e mata aki pa no
huma esey, pasobra, e no ta
bon pa bo. E ora no plant'e!
No cultiva e mata aki! Esey
lo ta un maneho mas simpel
y mas logico. Loke tampoco
no ta logico, ta cu no por re-
emplaza entradanan cu un
refinaria ta produci cu loke e
marihuana lo produci. Ta ora
bo no tin vision so, bo por
bisa tipo di cosnan asina.

Nos ta mira hopi maniobra
pa haci e problema di legali-
sacion di marihuana parece
menos serio cu e ta. Ta uza
nomber di e mata cannabis,
pa no yama e cos manera e
ta conoci den boca di pueblo
cu ta: marihuana. Tin ora ta
papia cu lo legalisa solamente
e uzo medicinal di dje, pero
tur indicacion ta pa legalisa
e uzo recreacional na final di
dia. Esaki ta nifica cu hende
lo por huma e droga aki legal-
mente.

“Mi kier pa tur hende scucha
esunnan cu tabata den adic-
cion di droga antes y cu awor
ta libera di esaki”, e ta indica.
Casi tur a cuminsa cu huma
un joint di marihuana. No
ta tur cu a huma esey a bira
adicto, pero e chens pa bira
adicto semper t'ey y ta hopi
grandi. Gobierno mester pre-
veni riesgo pa hende cay den
adiccion, pero nan ta stimula
esaki door di hunga cu e idea
pa legalisa.

No hunga cu hende di e for-
ma aki, legalisando e droga

y despues spera cu e no tin
efecto negativo pa bo pueblo.
Esun cu hunga cu candela
lo wordo kima! Esey ta un
hecho. Loke ta haci e maneho
di gobierno actual mas tristo
ta netamente e hendenan cu a
cay den adiccion y cu mester
di e yudansa no ta hayando e
yudansa aki. Nos a mira cu a
reserva fondo pa maneho so-
cial, pero ora yega momento
pa uza e placa aki pa yuda
esunnan cu ta traha den pre-
vencion di adiccion, no tin
net nada concretamente cu
gobierno ta haciendo. Ta ter-
mina contract di hende cu ta
trahando cu alma y cuerpo
den e sector aki, na lugá di
partner hunto cu nan.

Con un gobierno cu ta serio
pa cu su pueblo, un gobierno
cu ta bisa cu: “e ser humano
ta central”, ta trahando duro
pa legalisa e droga y na mes
momento no ta move un
dede pa esunnan cu kier sali
di nan adiccion of yuda esun-
nan cu ta yuda e hendenan
cu kier sali di nan adiccion?
Claramente nos por mira aki
un bialha mas, un gobierno cu

no tin un maneho coherente.
Kier legalisa e cos, y spera
nium hende bira adicto. Kier
legalisa e cos pa gana placa,
sin pensa riba e consecuencia
social, e consecuencia eco-
nomico y e consecuencia hu-
dicial pa bo pais. Kier legalisa
e cos y no yuda esunnan cu
a bira adicto pa motibo di
e marihuana. Esaki no por
sigui asina!

Un ehempel mas dicen e
gobierno aki no ta serio cu e
topico di legalisacion di mari-
huana ta pasobra gobierno a
bisa Parlamento cu lo haci un
investigacion riba un posibel
legalisacion pa loke ta trata e
uzo medicinal. Lo presenta
esaki na Parlamento pa de-
libera riba dje. Awor sin pre-
senta e investigacion prim-
inti, minister Oduber ta bisa
cu lo legalisa e uzo medicinal.
Pues ta parce cu nunca tabata
gobierno su intencion pa pre-
senta ningun investigacion na
Parlamento.

Ta djis mester a tarda e asunto,
talbes pa motibonan di rela-
cion den coalicion. Un otro

ehempel dicen gobierno no
ta serio pa cu nan legalisacion
di marihuana ta pasobra min-
ister no mester di Parlamento
pa e regla e uzo medicinal.
“Mi ta asumi cu e minister sa
bon bon cu si e tabata kier a
legalisa e uzo medicinal, e no
mester a ni bin Parlamento. E
mes como minister por a haci
esaki for di su prome dia di
trabou.”

Loke si mester bay Parlamen-
to ta si bo kier decriminalisa
marihuana. Esaki te ainda
ta un substancia prohibi pa
ley den nos Landsverorden-
ing Verdovende Middelen.
Aki nos ta mira cu minister
Oduber ta uzando strategia
pa tarda e problema pa moti-
bonan cu e mes sa. Nan kier
legalisa e marihuana medici-
nal prome door di introduci
e zeta y crema. Despues lo
mester sigui cu legalisa e
humamento medicinal pa
despues yega na e meta final
cu ta e humando recreacional
y e cultivo local. Esaki ta algo
cu nunca nos por permiti na
Aruba.